

DOMENIE XVIII «VIE PAL AN»

Antifone di jentrade Sal 69,2.6

Salvimi, Diu,
spessee a difindimi.
Tu sês tu il gno ripâr e la mê difese;
Signôr, no sta intardâti!

Colete

Vuarde, Signôr, i tiei fameis
e da la tô eterne protezion a di chei che te domandin;
a di chei che si tegnin in bon di vêti par lôr creadôr e paron
rinove lis robis che ti plasin e ten cont di ce che tu âs rinovât.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Qo 1,2; 2,21-23

Ce i restial mo al om in dute la sô fadie?

Dal libri di Qoelet

Nuie di nuie, al à dit Qoelet, nuie di nuie: dut al è nuie.

Parcè che and è un om ch'al à fadiât cun sapience, cun sience e cun impegn e al à di lassâ ce ch'al è
so a di un altri che nol à fadiât un colp. Ancje chest al è un nuie e une disgracie grande.

Di fat ce i restial mo al om in dute la sô fadie e tal afan dal so cûr, che si è lambicât sot dal soreli?

Par ducj i dîs de sô vite, il so lavôr al è dolôr e aviliment. Il so cûr nol padine nancje di gnot. Ancje
chest al è un nuie.

Peraule di Diu.

SALM RESPONSORIÂL dal Salm 94

R. Fâs che o scoltin la tô vôs, Signôr.

Vignît, batìn lis mans al Signôr,
fasìn fieste a la crete che nus pare;
presentinsi denant di lui ringraziantlu,
fasìn fieste cun cjantis di ligrie. R.

Vignît, butinsi a schene plete
denant dal Signôr che nus à creâts,
parcè che al è lui il nestri Diu,
e nô, il popul che lui al passone,
il trop de sô malghe. R.

Joi, se vuê la sô vôs o scoltassis:

«No stait a inrochîsi tal vuestri cûr come a Meribe,
come tal desert te dî di Masse,

là che mi an tirât a ciment i vuestris paris,
a an volût provâmi,

ancje se a vevin viodudis lis mês voris». R.

SECONDE LETURE Col 3,1-5.9-11

Cirît lis robis di lassù là ch'al è Crist.

De letare di san Pauli apuestul ai Colossês

Fradis, se o sês resurîts cun Crist, cirîf lis robis di lassù là ch'al è Crist, sentât a la gjestre di Diu; pensait a lis robis di lassù e no a chês de tiere: di fat o sês muarts e la vuestre vite e je platade cun Crist in Diu. Cuan che il Crist, nestre vite, al comparissarà, alore ancje vualtris o comparissarês cun lui riviestûts di glorie.

Fasêt duncje murî lis parts ch'a son de tiere: fornicazion, sporcjetât, passion, golis disordenadis e chês gole di vê simpri di plui che e je rude idolatrie.

No stait a dîsi baussis un cul altri, parcè che si sês disviestûts dal om vieri e dal so mût di operâ e si sês riviestûts dal gnûf, che si rinove, par une cognossince plui plene, sul stamp di chel che lu à creât. In cheste condizion no je plui cuistion di grêc e di gjudeo, di circuncidût e di incircuncidût, di barbar, di scite, di sclâf, di libar, ma di Crist, dut e in ducj.

Peraule di Diu.

CJANT AL VANZELI Mc 1,15

R. Aleluia, aleluia.

Il ream di Diu al è rivât:

convertîtsi e crodêt tal vanzeli.

R. Aleluia.

VANZELI Lc 12,13-21

A di cui larano lis ricjecis che tu âs ingrumadis?

Dal vanzeli seont Luche

In chês volte, un de fole i disè a Gjesù: «Mestri, dîsii a gno fradi di spartî cun me la ereditât». Ma lui i rispuindè: «Amî, cui mi aial metût come judiç o mediatôr su la vuestre robe?». E ur disè: «Viodêt di tignîsi lontans di ogni sorte di avarizie, parcè che ancje se un al è une vore siôr, la sô vite no dipent de sô robe». Po ur contà une parabule: «Al jere un om siôr ch'al veve terens e chescj i vevin dât un bon racolt. Lui al resonave dentri di se cussì: Cumò no ai plui dulà meti il gno racolt; cemût aio di cumbinâ? E al disè: O cumbinarai cussì: o butarai jù i miei depuesits e int fararai sù di plui grancj, in mût di podê ingrumâ li dentri dut il gno forment e la mê robe. Po mi disarai: Bon! Cumò tu âs metude vie une buine scorte par un grumon di agns. Polse, anime mê; mangje, bêf e gjolt. Ma Diu i disè: Om cence sintiment! Juste usgnot ti tocjarà di murî e a di cui larano lis ricjecis che tu âs ingrumadis? Cussì i capite a di chel ch'al ingrume ricjecis par se e nol devente siôr denant di Diu». Peraule dal Signôr.

Su lis ufiertis

Santifiche, Signôr te tô bontât, chescj regâi
e, daspò di vê acetade l'ufierte de vitime spirituâl,
fasinus diventâ ancje nô une ufierte eterne.
Par Crist nestri Signôr.

Antifone a la comunion Sap 16,20

Tu nus âs preparât, Signôr, un pan dal cîl,
un pan in grât di dânus ogni contentece
e di sodisfâ ogni gust.

Daspò de comunion

Compagne cu la tô continue protezion, Signôr,
chei che tu âs ristorât cul regâl dal cîl
e fâs diventâ degns de redenzion eterne
chei che no tu ti stufis mai di vuardâju.
Par Crist nestri Signôr.